

Visoki predstavnik u BiH Valentin Inzko rekao je u petak (18. septembar) nakon sastanka sa Matanom Žarićem, generalnim direktorom "Elektroprenosa BiH", da EU planira da investira oko 64 mil EUR u energetiku BiH.

U svom obraćanju medijima, Inzko je rekao da je posjetio dvije najuspješnije firme na državnom nivou, Upravu za indirektno oporezivanje i "Elektroprenos BiH".

- Gospodin Žarić ima velike planove za budućnost ovog preduzeća što se tiče investicija, sve te planove podržava i EU i jako je važno da BiH bude povezana sa evropskim energetske tokovima - rekao je Inzko i dodao da će EU investirati 64 mil EUR u domaću elektroenergetsku mrežu.

Inzko je čestitao menadžmentu za uspješan rad i akumuliranu dobit od 300 mil KM za posljednjih osam godina, koje sada treba reinvestirati u elektroenergetsku mrežu.

Generalni direktor "Elektroprenosa BiH" Matan Žarić prezentovao je visokom predstavniku u BiH ostvarene rezultate, ali i problematiku kroz koju prolazi kompanija "Elektroprenos BiH" u ovom momentu.

- Imamo problema sa Zakonom o javnim nabavkama, odnosno oko provođenja cjelokupne procedure oko izbora dobavljača za isporuku i za radove što u konačnici stvara problem da krenemo u realizaciju zacrtanih planova - pojasnio je Žarić i dodao da je zamolio visokog predstavnika da se uključi u rješavanje ove problematike, kako bi do kraja imali potpunu deblokadu oko cijelog procesa.

izvor: ekapija.com